

**Kayëte kigëna mba Pol nte  
kerëhnëkëhni vëvë  
Tesalonik  
Wade yehëhna hnë inji  
kayëte**

Kayëte kigëna mba vëvë Tesalonik va nëmpëlëna dūs gë ndënkwerënkw ña. Inji kayëte fëna vëhni Pol gë Silas do gë Timote matik wati nte nkeniho Korent hna mpëdara yëbëlan bëhn wafëhw wahnah g'imbed gë wahnah gë bëhn wafëhw imbëd gë wahi (49 gë 52). Pol camehnëdëha Wënu ña soje ile nkoni kahnëndani harënkw wahorot hna. Kamënaÿehnëdëhëhni tëfëni nkaw nte tëhnani hnë Këris ña do kamënaÿehnëdëhëhni ntini fop vantiyehn vante wëatik hn'ikwëtahn hna.

Vële hwëtahnëk va fop boka Ahwëhn a napëdëni do Pol pacëhnëndëhëhni iÿin diyana ten. Pol ndëkwëtehnëdëhëhni wëdahëse wante ryënkwëhni d'iboka Këris ña. Ani g'umë, had fuhnë, macinëkëfu nufin nkaf d'oku hnë d'uniÿa li.

Wëlin wanës wakwëhn nafa hn'inji kayëte: aÿënta, Pol, iboka, kayëte, yam, ikwëtahn, fanka, satah, Ayapah, doku.

Wëlin gante nke kayëte ka:

Simpaÿi (1.1-2)

Ahwëhn a njijëd kitiñ d'uniÿa ÿi (1.3-12)

Ile ryënkwëhni dëha mbokahnind Ahwëhn a (2.1-12)

Iyaŵ hn'ikwětahn (2.13-17)  
 Pol tēyēd wayēfa (3.1-5)  
 Imac dokuŋa had Pol (3.6-15)  
 Iyēfa gē simpaŷi (3.16-18)

### *Simpaŷi*

<sup>1</sup> Ami Pol gē Silēve\* do gē Timote herēhnēryidēhu, ŵuhnē vēvē cery sali vē Tesalonik le kwēhnēk Wēn Rēm fu ŷa do gē Ahwēhn a Yesu Kēris. <sup>2</sup> Arabi Wēnu ŋa Rēm fu ŷa do gē Ahwēhn a Yesu Kēris njēdēnihu ipērēna gē yam ŷa!

### *Ahwēhn a njijēd kitij duniŷa ŷi*

<sup>3</sup> Vēyēnta fu, tēfēkēfu samehnēndēfuna kwēlēkwēl Wēnu ŋa soŋe hun. Umē saŋah ye, kabi ikwětahn hun ŋa nayaŋa nayēd, do inahnēl nte hwēhnarun ŋa gwēna ŋa nkwēnad. <sup>4</sup> Soŋe rac, cēkwaryēderun hnē vacery sali vakawāry vēmba Wēn hna. Ha, njawēnērun do kwētarun ikwětahn hun ŋa la gante korotehnēderun ki do duñēnadun hnē vambēr vasiyamah. <sup>5</sup> Vēyin fop fēhnētanēd kiti Wēnu ŋa satah ye, gante nuhanderun had vēle tēfēk Inawē Wēnu ŋa, soŋe rac horotahnēdun.

<sup>6</sup> Paryi nke, Wēnu ŋa catēk: horot cosēdēhēhni vēle horotehnēdēhu va <sup>7</sup> do njinēgehnēdēhu ŵuhnē vēle horotēd vi, do fuhnē fēna. Watac nked ge Ahwēhn a Yesu matini g'ambin gē wamēleka wadēwu wakwēhn fanka ŋa; <sup>8</sup> hnē fagant hwēdēh hucankaf njijēd, do pinijēdēhēhni

---

\* **1:1** 1.1 Silēve: Ale ŵacik Silēve ŷa ŵacik fēna Silas hnē kayēte 1 Vēvē Tesalonik hna.

vële wok vëyëtëdilahna Wën va do wok vëwawëhnëdîna Wanës Wakasëk Ahwëhn fu Yesu ña. <sup>9</sup> Ibëv kwëlëkwël ña yed icos dëw hni ña gë ñawëta Ahwëhn ña do gë ñawëta icëmb fanka falëwu fa, <sup>10</sup> ge njijëk hnë fac rac soje cëmbëniha do naÿënëniha vële kwëhnëk do hwëtahnëka umë va. Wuhnë dënk gë vëhni nkentëderun, kabi kwëtahnërun wante rëfëtanëhnirun ña.

<sup>11</sup> Soje rac ye, yinëgadilëfuhna iyëfan hun ña. Njëfadëfunëha Wën fu ña gante ntihandëhu vële tëfëk uwac lëwu wã ile macëku. Njëfadëfunëha arabi, gë fanka falëwu fa, ndemawu aliwu fop iña përen ña gë fop ntiyehn nte watik hn'ikwëtahn hna. <sup>12</sup> Koyëna, uwac Ahwëhn fu ÿa Yesu ntënënefë soje hun ÿa do wuhnë ntënënefëderun soje lëwu ÿa gante nke ipërenä Wën fu gë Ahwëhn a Yesu Këris.

## 2

### *Ile ryënkwëhniðëha iboka Ahwëhn a*

<sup>1</sup> Awa, vëÿënta fu, soje iboka Ahwëhn fu ÿa Yesu Këris, g'ibarël fu ðarël lëwu, muntaderun: <sup>2</sup> ge ahnë ntehnëku fac Ahwëhn a tëkik, nt'awawu ahnë mpaÿëmpaÿehn wahakili hun wã ma ntakënowu gë wante watik hn'iyir ma hnë wanës ma hnë kayëte, lakënde ntehnëhni ÿal fu matik. <sup>3</sup> Antë awawu ahnë tokawu gë sifa wamër-wo; kabi ani gë tëkahind ÿa afo iyahëta canka Wënu ña nke ten do Ayapah a tufëhnað, Ajë ibëv ña, <sup>4</sup> ale humað ntehn umë lëbëk fop ile wacik wën ÿa ma sëmbëde ÿa. Ndëkënað dënk

umë ntaña hnë Acery Wën Cankaf hna mëca ntehn umë ye Wënu ña. <sup>5</sup> Dënkwëtaðiluhna bi nësëhnëmuno wani ante nkobuho hnë wühne ña? <sup>6</sup> Do tame njëtërun ðus ile wëmaÿehnëka gante nkoð tufëhnana hafo ge tëkëk wati le hahnëndik ÿa. <sup>7</sup> Fanka Ayapah le soŵak ÿa ðoku ÿa nkehahnëk; bare ale wëmaÿehnëka ÿa nkoð memaÿehn hafo ge cáhëtik. <sup>8</sup> Awa, Ayapah a tufëhnað, umë ale ndawëð Ahwëhn a Yesu gë sël wës lëwu ÿa, g'icëmb nte lapëhnajëka itëk dëwu ña. <sup>9</sup> Fanka Sintani fa yiyehnidëha Ayapah a Mbëvehnëðëha; tufahnëð wantiya vante-wo-vante vakwëhn fanka, viÿë vifëmpëhnahnah gë wëdahëse soñe tokahnëhni vahnë va. <sup>10</sup> Gë sifa vankeya vameh va fop, tokadëhëhni vële sëvëð va. Cëvëðëni kabi vëhacana inahn toña le fehëtakëndëhëhni ÿa. <sup>11</sup> Soñe rac, Wënu ña njëðanahnikëhni fanka fale rokað, umë feñëðëhëhni kwëtahnëni wamër ña. <sup>12</sup> Awa, fop vële wok vëhwëtahnëna toña va, bare ÿað wameh va, kitinëðeni menëni.

### *Iyaŵ hn'ikwëtahn*

<sup>13</sup> Vëÿënta fu, ge fuhnë ye, tëfëkëfu samehnëndëfuna kwëlëkwël Wënu ña soñe hun ÿa, wühne vële ñahnëk Ahwëhn. Wënu ña tëhnaku ayewu vëryënkwëryënk wële fehëtëde gë Iyir nte facënëð do gë ikwëtahn hnë toña hna. <sup>14</sup> Wënu ña macëku hn'inji peh gë Wanës Wakasëk wante haranjirun ña; soñe ahnuÿahnu icëmb Ahwëhn fu Yesu Këris. <sup>15</sup> Awa, vëÿënta fu, yaŵënyarin do kwëtaryin ikarañ nte haranjirun gë wanës ña ma gë wante

herëhnirun ɲa. <sup>16</sup> Arabi Ahwëhn fu Ƴa Yesu Këris umë dënk do gë Wënu ɲa Rëm fu Ƴa ale Ƴahnëkëfu do yëd'akëfu g'ipërëna dëwu ɲa, ikamënaƳëhn nte wok pudina do g'itamahn gwamah soƳe ile përenak, <sup>17</sup> njawënayëhn wasakahn wã do njëdawu fanka aholahnu alindu do ahnësëndu kwëlëkwël ile nëfak.

### 3

#### *Pol tëyëd wayëfa*

<sup>1</sup> Awa vëyënta fu, watëkwala ɲa, yëfanëhnëryindënefu, soƳe wanës Ahwëhn ɲa camp ñap do ntënëni, had gante nkeho hnë wuhnë ki. <sup>2</sup> Yëfaryindëna fëna Wënu ɲa pehëtëfu gë vahnë vëwëh do gë viyapah va, kabi gena vahnë va fop wãwëd kwëtahnëni. <sup>3</sup> Bare Ahwëhn a kahnëndak. Njawënedëhu do keryëdëhuna Awëh. <sup>4</sup> Wëlin itamahn nte hwëhnabun hn'Ahwëhn hna soƳe wuhnë: ntifun le lehnirun Ƴa do nkorun alindu. <sup>5</sup> Arabi Ahwëhn a pabary wasakahn hun wã g'ijahn Wënu ɲa do g'iduñëna nte njëdahnëd Këris ɲa.

#### *Imac d'okuɲa had Pol*

<sup>6</sup> Vëyënta fu, ntehnëderun, g'uwãc Ahwëhn fu Ƴa Yesu Këris, ɲawëtaryinëhni fop vëyënta fu vële hëmak va do hwëhnak nkeya nte wok tëfëlëna gë ikaraɲ nte haraɲëbunëhëhni ɲa. <sup>7</sup> Wuhnë njëtërun d'us gante tëfëku arëfëtalahnunëfu ka; këmälëfunohna ante nkebunëho gë wuhnë ɲa; <sup>8</sup> ahnë-wo muntalëfunawohna ile rokëdëfun, ßare hnë horot hna do gë hn'ambër hna, g'umëd gë

g'anent, ndokuñebun soñe antë yefu idib ahnë hnë w̃uhnë. <sup>9</sup> Age ntibun wañi, gena kabi tēfēlēfuhna aryemawunēfu, bare ntibun koyēna aharañahniwu nkeya nte rēfēku arēfētalahnēndu. <sup>10</sup> Ha, ante nkebunēho ŷal hun ŋa, ntehnirunēho: «Ale wok ñadina ndokun ŷa tēfēlahna tok fēna.»

<sup>11</sup> Ntehnēdēfun wañi kabi nkwēryēdēfun ga nēsēde, nkeni hnë w̃uhnë vēhēmak, ñoñ vēlidina ge gena le wok gena wadēw̃ hni. <sup>12</sup> Vēle ye koyēna va, ntehnēdēfunēhēhni do kamēnaŷendēfunēhēhni g'uŵac Ahwēhn Yesu Kēris: tēfēka ndokuñēndēni yam do tokēndēni ŋacēñac ntēw̃ hni ŋa. <sup>13</sup> Bare w̃uhnë, vēyēnta mēn, antë njambe uli ufērēn w̃a. <sup>14</sup> Age ahnë ŋwēyēk wante herēbun hn'añi kayēte ŋa, kamahnēryina do aŷaŷētawuna, soñe cēfēhnahna. <sup>15</sup> Antë aliwuna aŷeŵ, bare ahni-rawuna had aŷēnta hun.

### *Iyēfa gē simpaŷi*

<sup>16</sup> Arabi Ahwēhn yam ŷa, njēdēndu umē dēnk yam ŷa kwēlēkwēl do fale-wo-fale nke fa! Arabi Ahwēhn a nke gē w̃uhnë fop! <sup>17</sup> Ami Pol, gē wēbák mēn ŋa dēnk kerēhnēryidēmu iŷi simpaŷi. Aki kerēdēfu ŵac mēn ge puhnabu vēkayēte mēn va fop do aki nke kerēh mēn. <sup>18</sup> Arabi ipērēna Ahwēhn fu ŷa Yesu Kēris nke gē w̃uhnë fop!

**Vikerëh Vikasëk Wën gë Wapëgwala  
Wamey: Vikerëh Vikasëk Wën gë Wapëgwala (New  
Testament+)**

copyright © 2018 Wycliffe Bible Translators, Inc.

Language: (Wamey)

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 21 Feb 2024 from source  
files dated 29 Jan 2022  
f961026b-f72f-5bd7-9f75-efa7f932577e